

Regional News Unit AIR Aizawl
Monday, October 07, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Lengpui Airport atanga Aizawl leh Delhi inkara thlawhtheihna thlawk tlang 10 dah a ni ta.
- Kumin thla 9 kal ta chung khan Mizoram Police leh Excise and Narcotics department hnathawkte chuan ruihhlo chi hrang hrang tam tham tak an man.
- Madhya Pradesh-a Bhopal ah ruihhlo cheng vaibelchhe 1800 chuang hu man a ni.



DELHI DIRECT FLIGHTS

Inrinni atang khan Aizawl leh Delhi inkara thlawhtheihna thlawk tlang 10 a awm ta a, Nilaini, Zirtawpni leh Pathianni-ah pheih chuan ni khatah vawi 2 thlawk a awm tawh dawn.

Civil Aviation thuneitute hnen atanga Akashvani Aizawl-in thu a dawn danin tunhma chuan Indigo thlawhna Airbus 320 hi Lengpui tumhmun leh Delhi inkarah chawlhkar khatah vawi 5 chauh 'direct flight' a awm thin a. Nimin khan direct flight dang pakhat chu chief minister Pu Lalduhoma'n a thlah liam nghe nghe a ni. Sorkar thuchhuahin a tarlan danin Inrinni khan Lengpui thlawhna tumhmunah Pu Lalduhoma'n IndiGo thlawhna Delhi leh Aizawl inkara thlawk thin a leta tihpun (doubling of flights) thar hawnna hmanpui-in, thlawhna thlawk belh hmasa bera chuang tur passenger hnenah Boarding Pass a hlan a, Thlawhna a vai liam bawk.

A hawnna inkhawm tawi-ah hian Chief Minister chuan, Mizoram mipui mamawhna hriatpuia hetiang an neih theih na'na hma laksaktu sorkar laipui a Ministry of Civil Aviation leh IndiGo Airlines te chungah lawmthu a sawi a. Hei hian India ram laili leh Mizoram chu inpawh nasa lehzualin a siam dawn a. Official-te chet velna atan te, sumdawngte'n hma thar an lakna atan te, phai lam pan ngai damlo tan te, leh zirlaite tan te a tangkai em em dawn a ni a ti a. Mizoram ram mawi tak hi tlawhpawh awl lehzualin a siam ang a, khualzin tan tlawh pawh a awlsam leh zual dawn a ni, a ti. Mizoram sawrkarin civil aviation hmasawna lamah hma a la chho zel dawn tih tarlangin, Lengpui Tumhmun a tul anga tuaihnum chhoh zel a nih tur thu te, Mizoram hmun thenkhata Heliports din a nih tur thu te a sawi bawk.

Chief Minister hian Thlawhna thlawk belh hmasa ber tur lawmna cake a zai a, a chuang tur passenger thlan chhuah pakhat hnenah Boarding Pass a hlan a, Thlawhna thlawk chhuak tur hi a vai liam bawk.

IndiGo hian kar khata thlawhna vawi 5 an lo thlawhtir thin chu vawi 10 ah an tipung dawn a. Nitina thlawk a awm bakah Nilaini, Zirtawpni leh Pathianni-ah vawi hnih thlawk a awm dawn a ni. Hetianga IndiGo in a thlawh zat a leta an tihpun chhan hi kumtir lama Chief Minister in Ministry of Civil Aviation-a hma a lo lak tawhna rah a ni.

A hawna inkhawmah hian Pu R K Singh, Special Director, IndiGo pawhin thusawiin, he hmalakna hian India ram laili leh Mizote inkarah inunauna tha zawk, inpawhna nghet zawk a siam an beisei thu a sawi a. Mizoram sawrkar hmalaknaah an lawm thu a sawi bawk a. Mizoramin thlai thar hralh tur a neih, Thlawhnaa phurh chhuah theih dan tur pawh an lo dap tur thu leh a hrana ruahmanna duan an lo tum tur thu a sawi a ni.

He hunah hian Lok Sabha MP Pu Richard Vanlalhmangaiha, Pu H. Lalzirliana MLA, Chief Secretary Dr. Renu Sharma, Secretary to Chief Minister Pu Vanlaldina Fanai bakah Civil Aviation official pawimawh te, IndiGo Airlines thuneitute an tel a ni.



DRUG SEIZURE

Kumin thla 9 kal ta chhung, January leh September thla inkar chhung khan Mizoram Police leh Excise and Narcotics department hnathawkte chuan ruihhlo chi hrang hrang tam tham tak an man.

Thla kaw kalta chhung hian Police leh Excise & Narcotics department mite'n heroin an man belkhawm chu kg. 104 leh gram 266 zet a ni a. Methamphetamine hi kg 577 leh gram 59 manin ganja kg 841 leh gram 98 an man bawk a ni. Crystal Meth hi Police-in kg 35 leh gram 155 an man a, Excise and Narcotics hian nikum khan engemawzat manin kuminah erawh chuan man an la nei lo a ni. Heroin leh methamphetamine hi Asia chhim chhak lam atanga Myanmar ram kaltlanga rawn tawlh luh a ni a, Ganja hi Manipur leh thenawm state dang atanga a ruka rawn tawlh luh niin tunlai hian Mizoram thalaite'n an ching thar leh hle niin dan kengkawhtute chuan an sawi a. Hei bakah hian khuh damdawi, a bikin codeine tel chi bakah Alprozalam, diazepam, nitrazepam leh tramadol te tam tham tak man a ni bawk a. He'ng damdawite hi phalna nei a siamchhuah a ni chungin Mizoramah hian thalaite'n ruihna atan an hmang uar hle a ni.

Police department mite hian kumin January leh September inkar chhung khan heroin kg. 67 leh gram 19 an man a, Excise & Narcotics department hnathawkte chuan kg 37 leh gram 76 an man thung a. Methamphetamine hi Police in kg 454 leh gram 624 manin Excise & Narcotics department mite'n kg 122 leh gram 435 an man bawk a. Ganja hi Police lamin kg. 294 leh gram 765 an man lai-in Excise & Narcotics chuan kg 546 leh gram 335 an man thung a ni. Police hian an ruihhlo man hlut zawng hi an tarlang a. Hemi hun chhunga ruihhlo an man zawng zawng hi cheng vaibelchhe 184 leh nuai 44 hu ni-in an chhut a. Heroin bik hi cheng vaibelchhe 20 leh nuai 15 hu a chhutin, crystal meth an man hi cheng vaibelchhe 105 leh nuai 46 zet hu niin an chhut a, methamphetamine an man chu cheng vaibelchhe 59 leh nuai 10 chuang hu niin an chhut a ganja an man hi cheng nuai 14, sing 7 leh sang 3 chuang hu a chhut a ni bawk. Excise & Narcotics department thuneitute erawh chuan an ruihhlo man hlut zawng hi an tarlang ve lo a ni.

Police hian dan kalha heroin tawlh chungchangah thubuui 246 ziaklutin mi 328 an man a, crystal meth kaihnawihah thubuui 4 ziaklutin mi 3 an man a, methamphetamine tawlhthu a rinhlelh mi 40 manin thubuui 19 an ziaklut a. Ganja chungchangah thubuui 17 ziaklutin mi 20 an man bawk a ni.

Hetih lai hian kumin chhung hian ruihhlo hmansual avanga thi hi Excise & Narcotics department chuan mi 61 an chhinchhiah a, ruihhlo hman avanga thi zinga 53 hi mipa an ni a, 8 chu hmeichhia an ni. Kumina ruihhlo vanga thi 61 zinga mi 34-te hi heroin vanga thi an ni a, mi 27-te chu heroin leh damdawi ruih theih dang tihpawlh avanga thi an ni. Kum 1984 khan Mizoramah ruihhlo hmansual avanga thi pakhat chhinchhiahin hei hi ruihhlo kaihhnawiha thi chhinchhiah a ni a, heroin vanga thi a ni. Hemi atanga chhuta tun thleng hian ruihhlo avanga thi hi mi 1,873 an tling tawh a, an zinga mi 225-te chu hmeichhia an ni. Mizorama ruihhlo vanga thi mi 1,873 zinga a tam ber mi 1,161-te chu tunhma a thalaite'n an hmansual nasat tak, nachhawkna chi khap spasmo proxyvon leh parvon spa vanga thi an ni a. Heroin vangin mi 267 an thi tawh a, damdawi chi hrang hrang khawih kawp avanga thi hi mi 445 an awm bawk.

Kum 1990 hma lam kha chuan spasmo proxyvon leh parvon spa avanga nunna chan chhinchhiah a awm lova, heroin leh hroin vanga thi an tam ber a. Kum 2017 hnu lamah he'ng nachhawkna damdawi avanga nunna chan hi an awm zui tawh hek lova. A chhan chu sorkarin siamchhuah a khap tak vang ni a sawi a ni.

Mizoram thenawm, km 404 zet a thui ramri a tawmpui Myanmar hi ruihhlo siamchhuahna hmunpui Golden Triangle nena a inhnaih avangin tun hma atang tawhin Mizoram hi ruihhlo tawlhrukna kalkawng kumhlun a ni a. Chuti chung chuan February ni 1, 2021 a Myanmar sipaite'n mipui thlan sorkar paihthla a thuneihna an pawnglak atang khan Mizoram a ruihhlo tawlh luh hi nasa takin a hluar zual a. Hei hi Myanmar sorkara inrelbawlina fel a awm tak loh vang niin dan kengkawhtute chuan an ngai a ni.



LADC VERDICT

Gauhati High Court chuan Lai Autonomous District Council (LADC)-a MDC pahnih - Pu L.R.Dingliana Chinzah leh Pu N.Zangura te chu MDC an nihna atanga ban lo turin thupek a siam.

Gauhati High Court-a judge pahnih justice Nelson Sailo leh justice Marly Vankung te thutna bench chuan Ningani khan he thubuai chungchangah hian thutlukna siamin independent a thlan tlin, ZPM an zawm tak avanga MDC an nihna atanga ban tura tihna chu a hnawl a. LADC chairman Pu V.L. Hmuaka'n LADC (Constitution & Conduct of Business) Rules, 2010 rule 11 (6)(b)(c) tlawhchhana MDC atana ban tura a tih chu thu tling lo a ni a ti a. Autonomous District Council-te hi hemi chungchanga dan siam theihna thuneihna nei an nih loh thu sawiin hetiang thilah hian a hma lamah pawh court-in thutlukna hrang hrang a lo siam tawh chu a tlawhchhan a ni. Hetianga High Court-in thutlukna a siam tak avang hian Pu L.R.Dingliana Chinzah leh Pu N.Zangura te hian he thubuai-ah hian thiam an chang ta a ni.

MDC pahnihte hi LADC inthlan hnuhnung ber (kum 2020 tawp lam)-ah khan independent a thlan tlin an ni a. Kumin June 20 khan MNF, MDC pasarihte nen heng Independent MDC pahnihte hian ZPM an zawm a, ZPM an zawm vang hian LADC Chairman Pu V.L. Hmuaka chuan MDC an nihna paih an nih lohna chhan tur sawifiah turin July 12 khan lehkha pein ni ruk chhung hun a pe a. Anni pahnih hi Gauhati High Court-ah zualkovin court chuan an chungchangah kut engmah thlak rih lo tura thupek lailawk siamin Ningani khan thiam a chantirna thupek hi a tichhuak a, he thubuai hi a titawp ta a ni.



ZO UNITED

Nikuma Aizawla din, Manipur a Zofate insuihkhawmna pawl ‘Zo United’ chu Inrinni khan Kuki-Zo Council ti a a hming thlak a ni.

Nikum September ni 7 a Central YMA committee room a Manipur zofa pawl hrang hrang aiawhte’n Mizoram NGO Coordination Committee uapna hnuai a an din Zo United hi kum khat chuang a kal hnu-ah a hming thlak duhna a awm a. Hemi chungchangah hian Inrinni khan Lamka-a YMA Hall-ah Zo United hruaitute hi an thukhawm a, hetah hian he pawl a tel pawl hrang hrang 27 an kalkhawm a, pawl pathum - Committee on Tribal Unity (COTU), Manipur Tribals’ Forum, Delhi (MTFD) leh Kuki Inpi Saikul te chuan online-in vote an thlak a. Pawl hrang hrang 30 zinga 9 chuan ‘Zo United’ hming chhawm zui zel an duh a, pawl 19-in ‘Kuki-Zo Council’ ti a hming thlak an duh a, ‘Kuki-Mizo Council’ ti a thlak duh pakhat leh ngaihndan siam lo vote khat a tla bawk a ni.

A tam ber duhdan angin ‘Zo United’ pawl hming chu ‘Kuki-Zo Council’ ti a thlak remtih a ni ta a politics pawl a hlan kai a ni nghal bawk a. Mizoram NGO Coordination Committee pawmpui turin an thutlukna hi thawn a ni ang a, he pawl thar hi chawlhkar 2 chhunga inrem fel tura tih a ni.



GUJ

Narcotics Control Bureau chuan Gujarat ATS nen tangkawpin Madhya Pradesh-a Bhopal aṅging ruihhlo cheng vaibelchhe 1800 chuang hu an man. He thubuaiah hian mi pahnih man an ni tawh bawk. Heng ruihhlo hi Bhopal bula Bagroda khuaa factory aṅging an hmuchhuak a ni. Gujarat Minister of State for Home Harsh Singhvi chuan social media -ah he thu hi a nemnghet a, Gujarat ATS leh Narcotics Control Bureau-te chu ruihhlo hmansual dona kawngah a fak hle. He hlawhtlinna hian ruihhlo tawlhruk leh hmansualna kawnga dan kengkawhtute thawhrimna a lantir a ni, a ti.

